

胡文忠公遺集

胡文忠公遺集卷二十七

長沙鄭敦謹

湘鄉曾國荃

編輯

奏陳皖匪上犯官軍埽平賊壘並收復英山縣

城疏

八年二月二十五日督發

竊照太湖之賊恃其死黨屢思上竄當將正月二十
一二等日迎剿獲勝情形附片奏聞在案續據

管帶訓營之湖北糧道唐訓方稟稱該匪於二月初
六七日在安仁河一帶築壘初八日復分股上撲我
軍俟其逼近眾勇齊出攻其不備殺賊二百餘名生

擒五名安仁河一帶未成之壘悉行埽平初十日賊
越安仁河至蘄州之黃泥坂距唐訓方紮營之陳德
圍僅數里十一日各營掩息旂鼓以昌營前後兩哨
屯山岡左右中三哨紮東路以義左營五哨散布各
處以禮營五哨及正訓營扼中路以義營左右二哨
屯西路前後二哨紮後路以團勇屯於山岡最高之
處作爲疑兵都司銜守備梁洪勝脫去號衣佯爲鄉
兵以挑之我軍逼近巢穴賊由山徑抄出梁洪勝馳
馬殺悍賊三名身受二傷手擒賊目僞丞相韋朝綱
眾賊擁至梁洪勝恐賊目脫逃遂以佩刀斫韋逆復

身受三傷而始終不釋手迫我軍四面合攻團勇復從山巔壓下勢若建瓴賊眾大潰追殺六七里平壘七座賊自相踐踏燒斃羈斃約千餘名生擒二十六名內有僞正典尉周時選僞木八將軍胡尙直並前陣擒之韋朝綱均訊明正法此二月初八十一等日安仁河黃泥畝獲勝之情形也十二日該匪萬餘復由黃花嶺橫竄望天畝撲皖之英山縣而楚之楓樹坳牛頭衝打虎厰楊樹坳等處均與蘄水蘄州路路可通臣都興阿卽派參領富森保德明等前往應援臣官文等復飭該州縣齊團防堵十三日禮營訓前

營義營昌營攻賊於青天畷平壘八座焚斬殆盡是日唐訓方親赴牛頭衝一帶防勦飭義營候補知縣丁銳義於十四日直趨南陽河賊於北岸依山築壘迤亘數里遂令昌營由中路進訓前哨繼之禮營由右路進義右繼之義營親兵由左路進義左繼之昌營將抵南岸賊亦渡河而南都司余際昌乘賊半渡而擊之轟溺多名後渡之賊分股包抄我後丁銳義率親兵突至把總唐啟虞楊作霖守備張養吾左右截擊守備朱恢三冲開中路鏖戰多時礮斃大旂賊目三人餘賊紛紛涉水我軍於賊潰時分兵潛渡下

游統伏於北岸山谷間迨全軍北渡而日初過午也
壘中之賊復招潰賊列陣山腰我軍及團勇亦列陣
相持有執藍旂賊目率羣賊下撲丁銳義縱馬迎擊
左足已中矛傷大呼馳入賊陣張養吾唐啟虞楊作
霖等策馬俱至鎗礮齊施賊反走我軍逼近壘邊拋
火器入壘中壘中之賊齊出我軍乘勝登牆破壘三
座羣賊分至救援忽山後旌旗突起賊固不知我兵
之先伏也遂大潰我軍合力併擊以連環礮轟之平
壘二十九座殺斃轟斃千數百餘名生擒一百七十
三名奪獲騾馬七十餘匹大銅礮三尊軍械無數訊

據生擒之賊供稱僞倚天侯陳士榮並僞將軍僞指揮等多名俱被殺此十四日南陽河大獲勝仗之情形也臣等伏查宿太之賊出沒往來實欲避實乘虛由閒道以撓楚楚之蘄水蘄州廣濟黃梅羅田麻城路徑百出均與豫皖接壤臣都興阿督率馬步先將太湖逆賊疊次剿洗前鋒已追及於石牌而賊遂折而北趨欲乘虛以犯蘄州兼以李孟羣回兵固始而六安之賊并力上竄分爲數股實屬防不勝防臣等以賊多兵少地勢紛岐一處扼要仍須兼顧數處惟有靜以制動尙可力遏兇鋒此次太湖南陽河賊匪

盤踞已經數月經此懲創實足以寒賊膽而振軍威
又羅田緊接英山另股賊匪分七路竄入該處僅有
候選主事姚敦禮一營眾寡之勢太懸該處團勇歷
年殺賊頗著戰功臣等札飭署羅田縣知縣崔蘭馨
集團協剿十五十六十七等日鏖戰不休練總六品
翎頂候選教諭王炳榮衝鋒遇害各勇憤激於十八
日由樂利河進攻焚燒賊營賊退英山遂乘勝攻圍
收復英城並追剿二十餘里而皖邊之打虎廠楊樹
坳牛頭衝等處又爲蘄水蘄州門戶臣都興阿現派
石清吉率飛虎三營臣胡林翼又添調副將鮑超星

飛馳往會同唐訓方相機迎截至河南商城賊氛正熾臣官文等已先期派副都統舒保副將趙克彰等越境助剿賊匪潰退現查蘄州蘄水情形喫緊如商城賊勢稍鬆舒保趙克彰等尙須往來策應免致都興阿宿太各營再有反顧之虞所有連次以少擊眾均獲大勝實由唐訓方調度合宜文武各員非常用命可否仰懇 天恩俯準將按察使銜湖北糧儲

道唐訓方

賞加勇號運同銜湖北補用知縣丁

銳義請免補知縣以同知儘先補用花翎都司余際昌張嵩齡均請免補都司以游擊儘先補用余際昌

並請 賞加參將銜守備銜藍翎把總楊作霖請
以守備儘先補用並請 賞換花翎加都司銜又
都司銜藍翎守備梁洪勝張養吾朱恢三均請免補
守備以都司儘先補用加游擊銜並均請 賞換
花翎以示鼓勵其羅田陣亡練總六品翎頂候選教
諭王炳榮請交部從優議卹其餘在事兵勇可否擇
尤獎勵出自 聖裁

謹按疏內請獎卹各員均於三月初九日接奉
旨準唐訓方 賞給奇齊葉勒特依巴圖魯各號
再臣等前因固始被圍商城告警萬不得已於九江

圍城各營抽調三千人又於興國防兵抽調五百人
隨同舒保馬隊二百人援應商城半月以來皖賊大
股上犯宿松一路賊眾眈眈窺伺太湖一路之賊竄
聚張家塆陳德園地界連營數十座英山霍山之賊
竄入羅田邊境而蘄水蘄州警報疊至各路之賊屯
聚皖邊防不勝防情形萬分喫重都興阿馬隊千餘
名久戰力疲每次出隊僅祇數百名堪勝先鋒屢以
兵單爲慮臣等現飭道員李續宜另募湘軍數千人
擬俟隊伍已成卽會合舒保由商城直搗六安或由
蘄州蘄水并力竊太取道英霍責成舒保自當一路

其糧餉軍機均歸臣等調度接濟以期委任成功免致掣肘貽誤乃勝保屢次札調舒保由光固分兩路迎剿且稱如有遲延卽指名照有心貽誤軍機從重嚴參等語竊查勝保現與李孟羣龍澤厚等攻剿固始兵力已倍於賊其二月十一日片奏自陳五戰皆捷儘此兵力足以挫賊鋒而解城圍但以賊竄商城掠糧爲慮而現在舒保等已進駐商城則又必欲其速由光固分路迎剿竟似商城六安一路可以委棄不顧前後情詞矛盾殊所未喻且楚軍水陸各營全數出境畱黃州者五百人畱興國者五百人而已

臣之愚實欲由宿太英山六安等處節節掃蕩直搗
安慶勝保所奏似臣專以防楚疆爲重臣查皖省粵
逆分股上竄每股不下一二萬人若不力遏北岸賊
援則九江之功誤垂成而皖省更無肅清之日此則
尤爲東南數省安危所係勝保僅知固始一隅情形
而未通籌江皖之全局非臣等之自分畛域也至舒
保素性樸訥忠勇敢厚在楚屢年衝冒鋒刃卽如洪
山之役襄陽之役蕲黃之役實能爲他人之所難爲
從無避難就易之心該員現奉特簡漢軍副都
統二品大員勝保乃嚴札驅迫加以苛詞似於體制

未協師克在和古有明訓設將帥先已乖離則士卒
安能豫附即使舒保帶兵進剿將來束縛馳驟亦必
以不和貽誤兵機臣忝綰兵符過蒙 恩遇不患

威勢之不立而患誠信之未孚遇將帥咨商軍情必
反復詳悉各盡其意不敢稍存自是之心蓋以權術
凌人可馭不肖之將而亦僅可取快於一時其本性
忠良之人則並不煩督責而自奮也臣愚見自應責
成舒保審察商城六安固始各路賊情相機進剿毋
庸強歸鄰省節制調遣如皖省賊警蘄黃兵單仍須
取道麻城羅田以免都興阿大隊牽動庶可隨機應

變不致膠滯一隅貽誤全局除行知舒保查照外謹
附片陳明

再連日續據唐訓方稟報英霍逆匪窺伺蘄州蘄水
勢甚披猖我兵僅止二千五百而賊眾十倍於官軍
疊次稟請添兵救援等情前來臣等因省垣無兵可
撥是以臣胡林翼咨商舒保於商城各營酌調一千
五百名馳往援應舒保亦因商城事繁尙待三五日
後察看兩路情形何處喫緊再行酌度馳援是卽舒
保未便顧此失彼難以草率進兵固始之明證謹附
片陳明

上諭本日據官文等奏楚省邊防喫緊前派赴商城之舒保一軍已咨調一千五百名以助都興阿剿匪等語現在固始之賊疊經勝保等督兵剿擊已解城圍英桂勦辦阜陽土匪亦一律肅清業經行抵汝甯已諭令就近督兵會剿商城零匪無多當可無虞延蔓英霍之賊現已竄入羅田邊境窺伺蘄水蘄州都興阿兵力單薄楚省軍情較爲喫重著官文等卽飭舒保一軍仍回羅田麻城一帶會同都興阿實力防剿以顧楚省門戶將此由六百里諭令知之欽此

密陳浙江緊要軍情請調員防剿疏 二月二十

八日

竊臣準江西布政司龍啟瑞函稱粵逆翼賊石達開
竄踞江西之鉛山河口地方賊數頗眾約在二萬以
外聲稱欲竄浙江現在將軍福興退守廣信府城按
兵不動又據函稱二月初四日賊破廣豐經饒鎮擊
退賊尙盤踞離城三十里之洋口並離上饒十五里
之皂頭一帶河口之賊於二月初一二日盡數東竄
等語臣查鉛山廣豐上饒俱屬廣信緊逼玉山玉山
爲浙江門戶實爲江西入浙通衢今石逆旣竄廣豐
其勢必窺伺浙江浙江此時防堵能否嚴密臣不敢

遙斷然近來用兵各直省必有知名將弁一二人習
練勁旅以資捍禦浙省文物之邦民氣柔弱未習軍
旅再查軍興以來浙省尙稱完善其杭嘉湖等府與
蘇松接壤向稱財賦之區課稅饒裕貨物充積近年
粵匪肆擾漕運梗塞惟藉江浙兩省海運上備天
庾正供萬一賊眾乘虛闖入其爲害何可勝言將軍
福興統帶兵勇現在廣信城中臣查福興前於咸豐
二年賊圍長沙經賽尙阿嚴檄催提該將軍在湘潭
一月不進迨經報明起程七日之內不過三四十里
似此情形卽賊由廣信城外逕過直趨浙江恐亦未

能追勦是將任賊之狂竄而莫之禦也如大局何臣
於江西諸將頗知大概其距賊遼遠者一時調赴殊
虞不及查有管帶平勇道員李元度素性忠義才足
任事舊隨曾國藩帶勇多年屢著戰功上年九月以
數千人守貴溪孤城當數萬悍賊卒能保全無患該
道員現紮江西貴溪地方若調使繞道赴浙趨出賊
前迎頭堵截雖其所帶僅四千餘人未必足以當大
股賊眾然使其扼守要隘阻遏賊鋒必能得力或使
之保護城池則節操凜然不可搖動合無仰懇

天恩諭飭李元度卽率所部兵勇前赴浙江繞道趨

出賊前擇要扼守以遏賊蹤該營勇丁約四五千
人月餉約不滿三萬兩請

旨飭下浙江巡撫按月

接濟毋稍虧欠並請

皇上於江南金陵城外諸

將中酌派一人統帶大兵前往浙江以資防剿蓋金
陵久經賊陷其克復猶可徐圖而浙江糧賦重地其
保全不容稍緩至該道員李元度所帶勇餉積欠甚
鉅臣當先由湖北預行籌撥銀一萬兩並帳房軍械
解赴該營以爲拔營啟行之資倘至浙以後或勇力
不敷臣當隨時添募咨送赴浙庶令其盡心營務可
無竭蹶之虞現在湖北餉需萬分支絀臣爲統籌全

局起見力所能爲不敢不勉見所能及不敢不言謹
會同湖廣總督臣官文具摺密陳是否有當伏乞

皇上聖鑒訓示謹 奏

謹按此疏奉

諭旨交西安將軍福興江西巡撫耆齡酌辦矣

另覈獎敘籌餉尤爲出力人員疏 二月二十八

咸豐七年八月二十二日準吏部咨兩湖籌辦軍需
出力之原選山西高平縣知縣張黼華並未赴部尙
不得爲候選知縣乃因兩湖籌辦軍需出力以知府
用又因籌餉出力免選知縣並免補同知直隸州知

州以知府不論繁簡遇缺卽選覈其勞績係籌辦軍需及籌餉等事與軍營打仗出力不同相應奏明請

旨將前任湖北襄陽縣教諭選授山西高平縣知縣張黼華籌辦軍需出力保奏以知府用並免補同知直隸州知州以知府不論繁簡遇缺卽選之案概行撤銷仍飭該撫另覈奏請獎敘奉 旨依議

欽此咨會到臣當卽轉行遵照去後臣查軍務省分

籌餉更難於籌兵而外省人心好名不如其好利設委任非人則官吏之中飽實礙軍國之至計自應擇尤獎勵以昭激勸查原選山西高平縣知縣張黼華

於咸豐四年八月內經前將軍臣官文督臣楊需於

襄陽府辦理防剿團練出力案內會保請俟選缺後

以同知直隸州升用復經臣於六年保以知府用七

年三月保以知府不論繁簡遇缺卽選特以餉最難

籌欲獎一人以勵其餘並非有私意也嗣準部咨以

覈其勞績係籌辦軍需及籌餉等事與軍營打仗出

力不同請旨將張黼華保舉撤銷飭臣另行覈

奏請獎自當遵照部議另覈獎敘臣查原選山西高

平縣知縣張黼華廉正自矢力濟時艱自咸豐五年

八月委辦襄陽局釐金至六年八月實籌解釐金錢

一十四萬六千串有奇接濟武漢軍餉六年九月因
襄陽土匪滋擾釐局暫停土匪平後仍復開局抽提
自六年十一月起至七年十一月底止又籌解釐金
錢十三萬六千串有奇該員潔已自愛分文不以入
已實屬籌餉尤爲出力之員相應遵照部議另覈請
獎所有原選山西高平縣知縣張黼華可否準以同
知直隸州不論雙單月卽選並請 賞加知府升
銜之處出自 皇上逾格天恩如蒙 俞允仍
俟楚省軍務完竣由 臣給咨赴部引 見除咨吏
部外所有 臣遵照部議另覈獎敘緣由謹恭摺具

奏

硃批部議速奏欽此

懇

恩免議襄隨失守各州縣本管上司疏

三月二十四日督發

竊準部咨咸豐七年閏五月十九日奉

上諭吏

部議奏隨州失守案內漢黃德道文輝例有處分著
查明該員到任日期並將穀城等州縣失守之該管
上司及同城佐貳等官查取職名一併交部核議欽
此欽遵當卽行據該管道府陸續查覆由湖北藩司
馬秀儒等具詳前來臣等查漢黃德道舊駐下游黃

州前因德安甫經克復經臣官文委候補道文輝署理道篆駐紮德郡查辦善後於咸豐五年十一月十三日到任距所屬隨州一百餘里六年十月內文輝因公赴臣官文漢陽大營旋接所屬稟報隨州土匪趙邦璧等滋事當經臣等由大營抽撥兵勇飭令文輝會同副將文明等管帶馳往掩捕文輝等抵州後相機勦辦於匪眾竄入州城立時克復并將此股土匪全數勦滅辦理極爲妥速業經會摺 奏報在案又該匪先竄安陸府城並襄陽土匪滋事連陷襄屬穀城光化鄖屬保康竹山房縣荊門州屬遠安等縣

兼轄道員係升任臬司前任安襄鄖荆道羅遵殿前
於襄匪起事卽經臣等奏參欽奉諭旨革職

畱任嗣羅遵殿集勇籌餉會率文武殫力防守襄郡
得保無虞又復嚴督所屬將該匪竄擾之府州縣城
池迅速克復勦捕首要悉數就擒使襄郡一律肅清
復經奏蒙聖恩開復羅遵殿革畱處分又穀
城光化被匪竄陷之不同城襄陽府知府海已另
案參劾革職惟於隨同防守襄郡搜勦入山匪徒著
有微勞續經一奏奉恩旨賞給六品頂戴飭令
回旗又保康竹山房縣被匪竄擾不同城前任鄖陽

府知府捐升雙月道員旋經丁憂畱楚軍營辦事恩
祥於匪眾屢窺鄖郡先經率同官紳扼要堵禦仍會
督兵勇追剿保康房竹竄匪尅日收復城池已於襄
鄖肅清案內附摺具 奏在案又前署荆門直隸州
候補知州方卓然於襄匪竄犯當陽遠安屢次截擊
獲勝嗣遠安被匪襲擾方卓然亦卽督屬圍剿立將
城池克復除該員方卓然襄陽府知府海 已另案
參革外查升任湖北臬司前任安襄鄖荆道羅遵殿
已補漢黃德道文輝前署鄖陽府知府捐升候選道
恩祥於管轄兼轄所屬土匪竄陷之後督率文武兵

勇迅速克復尙屬奮勉而文輝由大營帶兵馳往將
全股匪類剿滅無遺羅遵殿於襄郡南北咽喉要地
力籌捍禦恩祥固守鄖郡以安秦晉不至如嘉慶年
閒三省教匪之役踞擾深山久於滋蔓該員等功過
尙足相抵又補用道員嚴澍森前署隨州案內被粵
逆上竄擾入城鄉嚴澍森捐資帶勇克復隨州嗣又
帶勇隨同收復德安府城業經臣彙案 奏保聲明
嚴澍森功浮於過請予免議在案相應籲懇 天
恩俯準將羅遵殿文輝恩祥嚴澍森各應得處分均
免置議出自 逾格 鴻施除該州縣佐貳等

官分別是否同城及差委出境另行覈實咨部辦理
外謹將查明襄隨土匪竄陷各州縣旋即克復案內
之該管道府等員據實覆 奏

謹按此疏於四月初 日接奉

旨 準

奏陳皖逆竄陷麻城官軍前往攻剿情形疏三
月二十六日督發

竊查楚軍圍攻九江屢次擊敗賊援計窮路絕首逆
陳玉成遂由安慶率悍賊數萬意在上竄武漢下援
九江查湖北黃州所屬地方黃梅廣濟與安徽之宿

松太湖交界蘄州蘄水羅田與安徽之潛山霍山英
山交界麻城則與河南之商城安徽之六安交界袤
斜五六百里分途疊竄均經湖北各路官軍分頭堵
剿先是商城固始戒嚴副都統舒保副將趙克彰等
越竟進駐商城僅畱游擊李曙堂信右營駐紮麻城
以顧後路復飭署麻城縣知縣汪敦仁率團勇駐於
商城邊界之兩路口兼以轉運糧餉探報大股粵逆
由六安之潛山霍山英山六安等處潛行竄聚皖豫
交界之金家寨李家集一帶舒保等正擬前往豫省
進剿三月初九日賊卽由李家集竄羅田之吳家店

又由吳家店分作四股以兩股撲羅田之松子關銅
羅關以兩股撲麻城之五斗坳長林關團眾禦之失
利初十日另股八千餘人由閒道翻山越嶺疾走了
角山圭峯山馬牙山一日夜行一百餘里竄周家衝
月形塘十一日至麻城之嚴家河游擊李曙堂以五
百人迎敵鏖戰半日眾寡懸殊爲賊所抄傷亡頗多
賊匪乘勢竄入麻城舒保等在商城邊界聞警回援
十三日賊出大戰我軍斃賊四百餘人賊退入城十
四日我軍移營於城西南之斗陂山遏賊上竄黃陂
孝感之路十五日於城東十餘里殲斃賊之偵探五

十餘名生擒十餘名十七日賊乃變計出大股由北而西而南以騎馬賊馳騁於田壠上下意欲誘戰而伏賊於各村樹林以抄我之後我軍鎮靜以待俟其近而突擊之賊敗走我軍又截擊其南路接應之賊訊據生擒之賊供稱賊匪初至約八千餘人續至則詐稱十萬實不過三萬餘人臣等查麻城僻在一隅實與黃岡蘄水黃安黃陂各州縣接壤距省城祇二百餘里既可上竄德安兼慮直犯漢陽該逆疊經都興阿李續賓李續宜等於皖省邊界力遏兇鋒遂變計由開道竄入豫省避實乘虛希圖內犯臣官文等

已飛飭舒保等就現有兵力分投剿守一面飛調水師分巡漢黃德三郡之內湖外江以防偷渡並調原駐宿松三郎河之副將鮑超五營三千餘人兼程上援又以知府銜候補同知直隸州何忠駿統新後營及新募之平江右營千人前往協剿以期速清上游二月內臣胡林翼已預募四千五百人派往九江交藩司李續賓訓練調遣此次卽於九江各營中抽撥湘副中湘左凱左凱右四營並派駐黃州之信中營與國之信左營並麻城現駐七營三千五百人均歸道員李續宜統帶臣都興阿亦抽撥富森保等馬隊

二起官文添撥喜昌等馬隊二起均分道赴麻城
進剿迅期殄滅所有署麻城縣知縣汪敦仁雖因督
團先駐兩路口距縣城九十里救援不及究屬疏於
防範應請

旨革職暫行畱任責令畱營效力以
觀後效至九江城賊窮蹙已極李續賓楊載福自二
月十六日起晝夜環攻地道雲梯數路並進城垣旋
轟旋補我軍壯士復被城上大桶火藥擲傷甚多李
續賓親督隊伍日夜不退義憤出於真誠然仰攻太
久壯士多傷竊料九江賊勢不過苟延殘喘終必聚
而殲旃而下游賊勢尙盛良將精兵必當愛惜已函

囑李續賓等相機持重毋許過於憤急合併陳明

硃批覽奏俱悉汪敦仁著革職暫行畱任並隨營效力欽此

上諭前據官文等奏粵逆大股開道竄陷麻城該大臣等調派水陸官軍前往攻剿本日據勝保等奏賊踞麻城楚兵進剿在東西南三面惟北路空虛恐該逆由此北竄請飭官文等合圍兜剿等語麻城與豫省光商一帶節節毗連該處甫經被擾若該逆乘虛北竄又被蹂躪李孟羣臣赴六安惟邱聯恩赴光州防堵所帶兵勇爲數無多官文等現調水陸馬步各軍分道進剿自應四

面兜圍爲就地殲除之計克復麻城後如有旁竄餘匪
務卽跟蹤追剿杜其北趨是爲至要著官文都興阿胡
林翼卽飭舒保等實力堵剿可也將此由六百里各諭
令知之欽此

胡文忠公遺集卷二十七終

胡文忠公遺集卷二十八

長沙鄭敦謹

湘鄉曾國荃

編輯

馳奏官軍克復九江疏

八年四月十一日督發

竊查九江郡城據江湖之形勝實南服咽喉而湖廣
江南之腰膂也自咸豐三年失陷首逆林啟榮以粵
省亂民竊踞已閱六年迭經官軍勦辦恃險堅拒迄
未得手六年臘初浙江布政司李續賓從武漢黃州
乘勝追勦七年春夏因蕪黃告警分援北岸而九江
之圍尙缺八月以後北岸肅清湖口克復臣等遂飭

添募勁旅以長濠六道三面合圍並分水師十餘營駐守北面江岸逆賊遂援絕路窮濠溝六層每道上下寬深均二丈分營分段日夜巡視無一賊能逸於濠外者隨會商福建提督楊載福按察使銜廣東惠潮嘉道彭玉麟於二月十六日起不分晝夜水陸環攻終爲礮石所阻旋據逸賊羅奏凱供稱城中賊勢雖蹙賊糧未盡所種麥苗將次收穫逆首林啟榮死守待援等語李續賓率王揆一等環城審視查得大東門外磨盤洲地方逼近城垣其中崗高並於城與左右兩崗連絡環抱如弓可於崗下潛開地道惟立

於崗頂則城上鎗子如雨遂令各勇依崗形勢盡一夜之力培土爲牆以鎗礮對城轟擊隨立重賞挑選精悍勇丁分三處開挖地道均於二月二十八日開工仍日夜列隊攻擊並幫運木梯多張旂幟故作登城之狀以疑之至三月二十五日東門地道轟塌城數丈二十九日南門地道轟塌城十餘丈兩次均被該逆以大桶火藥拋擲士卒多傷未得登城逆匪旋將缺口磊塞四月初六日迤東而南地道工竣李續賓復會商楊載福彭玉麟陸師攻東南西三面水師攻北門臨江一帶約於初七日寅刻發火飭副將沈

俊德率元右營參將劉連升率護軍左營從東南一帶以梯登城參將王載騶率元中營參將蕭慶衍率貞中營參將銜游擊楊富有率亨中營參將李存漢率利中營從小東門一帶以梯登城令王錦雲黃德汪心才李斌彪各率舢板逼城攻打部署已定而水陸將士咸痛三月二十五二十九兩日傷亡士卒之慘莫不歔歔飲泣人盡思奮及期火發頃刻磚石飛騰山岳震撼轟塌迤東並東南城垣一百餘丈李續賓飭王揆一劉運會毛有銘李景均等率中營右營副將李續燾率守備胡鎮南帶副右營參將朱希廣

率前仁營游擊黃澤遠率新後營都司銜守備余雲
龍率智營候選知縣蕭積仰率親兵營都司銜守備
李運絡率後仁營乘勢搶城騰越而上都司朱春堂
劉正南守備銜千總謝芝輝藍翎千總葉定海尹得
榮藍翎把總蕭楚勝譚占秋陳仕炳把總李續佳毛
汀泗李林盛藍翎外委鄧榮堂李光耿王功義外委
舒才錦黃澤和等首先登陴被傷殞命諸勇忿氣百
倍前者傷後者繼進衝上城頭刀矛並舉呼聲震天
該逆抵敵不住紛紛亂竄副將銜參將李登梗率亨
右營副將李長林率利右營參將唐義訓率強中營

由城外西南一帶截殺副將成大吉率貞右營都司
張復泰率護軍後營由西門外一帶截殺約兩時之
久城內勇掩殺而出城外勇衝殺而入該逆無路可
奔號叫之聲慘不可聞自卯至午殲除淨盡或死於
水或死於岸屍骸堆積流水腥紅軍中逃賊認識偽
貞天侯林啟榮偽元戎李興隆各賊目於亂屍中指
出隨將賊屍寸磔賊首梟示以抒積憤通計斃賊一
萬六七千名九江府城卽於初七日卯刻克復楊載
福彭玉麟先於是日五更派各營駐琵琶亭扼賊出
竄之路其由小北門逃出之賊數百人經李朝斌李

濟清孫昌國丁義方督師登岸概行殺盡其由龍目
河牆子內出賊數百人經劉德亮李定升彭志友督
師登岸概行殺盡其由大北門墜城逃出賊數百人
經孫昌凱何昌登蕭翰慶李升元督師登岸概行殺
盡城內城外本無一處去路亦無一賊漏網蓋自北
路五年連鎖高唐戰功之後未有如此次之勦殺無
遺不留餘孽者矣臣等查九江賊窟已閱六年萬餘
之賊頑梗負固其中決無善類設有脅從之民必早
投誠設計逸出此次盡數殲滅事雖慘而功則奇溯
自粵匪犯順以來每恃其堅守不戰綴我兵力遂以

堅守爲得計卽偶得一城或首要潛逃死灰復然因以蠱惑愚頑並力堅守經此大創足以寒賊膽而伐賊謀旣可不畱餘孽並可灰其死守之心此皆仰賴

聖主威福知人善任李續賓等得藉手以告成功現應如何水陸分道東征臣等卽當妥速籌商辦理浙江布政使李續賓忠藎勤勞厥功甚偉應請如何加恩之處伏候 聖裁按察使銜廣東惠潮嘉

道彭玉麟忠勇廉明請 賞加布政使銜候補副

將李續燾請 記名簡用並 賞加勇號候補

副將雷風雲請 賞加勇號候補參將李集賢蕭

慶衍王載駟朱品文成得升李存漢彭祥瑞劉連升
均請免補參將以副將儘先補用參將銜候補游擊
楊富有候補游擊黃澤遠均請免補游擊以參將儘
先補用並 賞加副將銜候補游擊朱升開請免
補游擊以參將儘先補用游擊銜候補都司趙友才
請免補都司游擊以參將儘先補用藍翎都司銜候
補守備鄒玉堂都司銜候補守備余雲龍均請免補
守備都司以游擊儘先補用鄒玉堂並請 賞換
花翎藍翎候補守備胡鎮南請免補守備以都司儘
先補用並請 賞換花翎藍翎候選知縣蕭積仰

請免選本班以同知直隸州知州不論雙單月選用並請

賞換花翎候選從九品毛有銘李景均文

童劉運會均請以府經歷縣丞不論雙單月選用並

賞戴藍翎已革署湖南道州知州候補知縣王
揆一請開復原官免繳捐復銀兩候補把總郭美南
請以千總儘先補用並請

賞加守備銜又水師
儘先副將李濟清請

賞加總兵銜儘先都司劉
德亮請以游擊儘先升用並請

賞加參將銜又
儘先參將孫昌凱請

賞加副將銜儘先都司李
定升請以游擊儘先升用並請

賞加參將銜儘

先守備何昌登請以都司儘先升用並請

賞換

花翎又儘先選用知府蕭翰慶請

賞加道銜儘

先參將孫昌國請

賞加副將銜又都司銜儘先

守備丁義方請以都司儘先選用並

賞加游擊

銜儘先守備李升元請以游擊儘先選用其餘在事

出力文武員弁兵勇可否容臣等另行查明擇尤保

獎出自

天恩以昭激勸謹將克復九江城池並

首要逆黨盡數殲滅詳悉情形會同江西撫臣耆齡

由六百里加緊馳

奏

上諭官文等奏九江克復逆匪盡數殲除一摺粵逆占踞

九江負嶠久拒自湖口攻克以後官文等添募勁旅挖濠合圍並分水師十餘營駐守北面江岸賊援遂絕本年二三月間李續賓等督勇開挖地道晝夜攻擊轟塌城垣數次本月初六等日水陸各軍分攻北門及東南一帶將弁等以梯登城用火轟塌城垣一百餘丈伏勇城中內外衝殺殲賊淨盡並將偽貞天侯林啟榮偽元戎李興隆各賊目寸磔梟示其斃賊一萬六七千名九江府城卽於初七日克復其逃竄之賊亦經官軍概行截殺並無一名漏網勦辦實屬奮勇官文等調度有方將士用命深堪嘉尚允宜渥沛恩施以示優獎欽差大

臣湖廣總督官文湖北巡撫胡林翼均著加恩賞加太子少保銜江南將軍都興阿著交部從優議敘福建提督楊載福著賞穿黃馬褂並交部議敘浙江布政司李續賓此次戰功尤著著賞加巡撫銜並賞穿黃馬褂按察使銜廣東惠潮嘉道彭玉麟著賞加布政使銜候補副將李續燾著記名以總兵用並賞給圖薩泰巴圖魯名號雷風雲著賞給幹勇巴圖魯名號候補參將李集賢蕭慶衍王載泗朱品文成得升李存漢彭祥瑞劉連升均著免補參將以副將儘先補用候補游擊楊富有黃澤遠均著免補游擊以參將儘先補用並賞加副將

銜朱升開著免補游擊以參將儘先補用候補都司趙友才著免補都司游擊以參將儘先補用候補守備鄒玉堂余雲龍均著免補守備都司以游擊儘先補用鄒玉堂並賞換花翎候補守備胡鎮南著免補守備以都司儘先補用並賞換花翎候選知縣蕭積仰著免選本班以同知直隸州知州不論雙單月選用並賞換花翎候選從九品毛有銘李景均文童劉運會均著以府經歷縣丞不論雙單月選用並賞戴藍翎已革湖南候補知縣王揆一著開復原官並免繳捐復銀兩候補把總郭美南著以千總儘先補用並賞加守備銜水師儘先

副將李濟清著賞加總兵銜儘先都司劉德亮著以游擊儘先升用並賞加參將銜儘先參將孫昌凱著賞加副將銜儘先都司李定升著以游擊儘先升用並賞加參將銜儘先守備何昌登著以都司儘先升用並賞換花翎儘先選用知府蕭翰慶著賞加道銜儘先參將孫昌國著賞加副將銜儘先守備丁義方著以都司儘先選用並賞加游擊銜儘先守備李升元著以游擊儘先選用其餘在事出力員弁兵勇著官文等查明擇尤請獎候朕施恩該部知道欽此

再浙江布政使李續賓忠勇誠篤其才力能統數萬

之眾而並不以權術駕馭爲能良由待人以誠處事
當理故能士卒感恩所向成功卽如馬隊水師各有
管帶偶與李續賓共事則彼此輯和互相策應又如
臣胡林翼撫標勇丁一萬餘人歸其統帶無不心悅
誠服樂爲之用臣竊計戡亂之畧得賢爲本如李續
賓之才識必可獨當大任爲國家之棟梁查皖省
自三年以後賊匪久踞百姓流離失所令人酸鼻而
潁毫壽春等處民與賊久無區別皖省兵勇怯懦冗
雜旋潰旋集勇與賊亦無區別若不及時肅清後患
滋大李續賓秉性剛正嚴毅無私在鄂在潯與臣同

事最久凡所諮謀無不同心協力皖省形勢緊要目前大計自應以九江得勝之陸師渡江剿辦先清北岸而後再及於江南水師則先清安慶而以餘力分討金陵或再以餘力調入蘇杭太湖等處此固全局所關不容稍分畛域者也都興阿所部兵力不多只能專顧一路而皖省地勢則必分兵三路乃能得力又必先勦安慶六安城外各處之賊俟各路賊勢勦殺已盡則安慶省城攻取自易否則頓兵城下動淹歲月兩賊又於無兵及兵弱之處狡焉思逞此又兵機之必當審重者也惟李續賓越竟遠征應否加銜

專奏以三事權而免牽制出自

聖恩至此次克

復九江李續賓應推首功楊載福亦勞績尤著惟均
系一二品大員應候 聖裁

上諭官文等奏九江克復逆匪盡殲一摺覽奏欣慰已明
降諭旨將該大臣等分別加恩獎敘矣粵逆占踞九江
久攻未克經楊載福等督兵不分晝夜水陸環攻並開
挖地道轟塌城垣將弁兵勇均各奮力先登將堅城克
復殲賊至一萬六七千名之多不留餘孽剿辦實屬奮
勇深堪嘉尚此時除分兵畱守九江外楊載福李續賓
等統領得勝之師分道東征應先往何處著卽乘此聲

威妥速籌辦現在和春等圍攻金陵屢獲勝仗尙屬得手惟因浙西告警江南迭次撥兵至衢州助剿鄧紹良一軍亦因賊匪欲內竄東壩高淳一帶防剿兼施兵力實形單薄九江兵勇共有若干如可分兵援應他處卽著抽撥二三千名派委得力將備帶赴鄧紹良軍營聽候該提督調遣既可防守甯國等處內竄之路設或浙中喫緊亦可調往援剿楊載福等水師仍當迅速東下節節埽除卽可與江南師船聯絡一氣一旦金陵克復太平蕪湖一帶竄匪必多此時先爲肅清日後易於剿辦李續賓已加巡撫銜出境後準其專摺奏事將此由

六百里諭令知之欽此

再此次克復九江城池都司朱春堂劉正南守備銜
千總謝芝輝藍翎千總葉定海戶得榮藍翎把總蕭
楚勝譚占秋陳仕炳把總李續佳毛汀泗李林盛藍
翎外委鄧榮堂李光耿王功義外委舒才錦黃澤和
均園首先登陣被傷殞命實堪憫惻相應籲懇
天恩飭部加等從優議卹以慰忠魂此次傷亡員弁
兵勇容再查明另案請卹理合附片陳明

謹按此片於四月二十四日接奉

旨準

上諭昨因官文等馳奏九江克復已諭令該大臣等除分兵畱守九江外楊載福李續賓等統領得勝之師分道東征應先往何處卽行妥速籌辦本日據勝保等奏現在攻取六安屢次克捷功已垂成惟官兵僅有二千餘名不敷攻剿附近賊船尙有數百竄突堪虞所調豫省官兵又因歸陳防堵不能卽時前往必須厚集兵力方可迅復州城福濟亦以廬州兵力不敷奏請添兵著李續賓卽帶九江得勝之師先行馳赴六安會同勝保等奮力圍攻俟六安克復再赴廬州一帶相度情形先其所急次第攻剿該藩司奮勇過人乘此聲威諒必能所

向成功其宿太一路賊匪並著都興阿迅速掃除毋令蔓延將此由六百里各諭令知之欽此

各軍攻勦麻城大獲勝仗疏

四月十四日督發

竊皖省大股逆匪間道竄陷麻城前將調派各路水陸馬步前往攻勦情形馳奏在案自來該逆踞城負固以守險築壘爲長技臣官文臣胡林翼前於添調候選道李續宜統兵起行之日已偵知該逆於城外廣築堅壘以阻我師當卽密授機宜馳往勦辦三月二十七日李續宜率各軍抵麻城後連日審察賊情地勢賊於城門加設木柵城上密布礮石滾木西

門外築壘十一座南門外築壘九座北門繞至東門外繇延八九里築壘三十八座壁壘高峻壕溝層疊儼若天塹李續宜與副都統舒保商議進兵於四月初二日卯刻以副將張文煥等率信中等營爲伏兵何紹彩等率正仁等營張旗以出舒保派馬隊四十匹輔之攻南門賊壘又以黃日勝等率左仁等營張旗以出而以朱品隆等率湘前等營爲伏兵舒保派馬隊四十匹輔之攻西門賊壘李續宜自率湘副中營以蔣凝學率湘左營巢日昇率信左營爲伏兵周寬世等率湘後等營張旗以出舒保自率馬隊一百

六十匹往來策應攻東北兩門賊壘布置甫定見該逆旂矛遍野率眾抗拒賊約二萬數千勢甚披猖我軍極力勦殺伏兵層出旁抄橫截連斃悍賊百餘賊遂敗入壘中憑牆施礮兵勇奮臂直前以低頭避礮爲恥力攻三時踏破北路各壘殺賊千數百又乘勝攻破東路各壘殺賊亦千數其時西路官兵聞東北兩路得手愈攻愈力都司謝國俊千總熊世定等首先登壘中礮陣亡各勇奮力衝入西路各壘同時焚毀馬步殺賊約二千名餘賊奔赴南門守壘又於朝聖門出賊四五千入壘助守鎗礮如雨副將張文煥

奮不顧身大呼先登已入壘牆中礮殞命各弁勇憤
恨切齒拚死擁入擒斬悍賊千餘南路賊壘一律毀
平餘賊盡退入城內死守我軍值天晚收隊綜計是
日殺賊五千數百生擒七百餘名內偽總制陳天發
偽將軍李天開及偽指揮石元亨等二十三名奪獲
大小礮九尊旂械無數訊據生擒賊供逆渠陳四眼
狗卽陳天豫自去夏靳黃敗後峙糧添黨蓄銳已久
遂勾結捻首張落刑龔瞎子等匪黨三四萬眾詐稱
十萬竄入麻城進窺武漢黃州等語當卽分別正法
現仍設計攻城等情由舒保李續宜飛報前來臣等

查麻城踞賊初勢猖獗之至經舒保李續宜等合力
攻勦埽平堅壘該逆外勢已失惟英霍宿太之賊又
分三股上竄欲援麻城已飭唐訓方等回兵防勦現
值下游九江踞賊盡數殲滅則麻城賊勢自孤無由
逞志除仍飛飭舒保等激勵士卒加勁圍勦迅圖蕩
事或有竄逸逆匪卽當無分畛域跟蹤追勦仰慰

宸懷外副將張文煥忠勇素著三月二十五日打
仗身受矛傷此次裹創出隊首先登壘中礮陣亡尤
堪憫惻應請從優照總兵例議卹又陣亡之藍翎都
司謝國俊請照游擊例議卹藍翎千總熊世定請照

守備例議卹藍翎把總許國泰杜志立把總朱瑞武
黃梅素均請照千總例議卹外委李承祿周楚德請
均照把總例議卹出自 天恩其餘傷亡勇丁並
出力員弁兵勇容分別查明再行籲懇 恩施謹
將四月初二日攻勦麻城踞逆埽平賊壘大獲勝仗
情形繕摺由六百里馳 奏

再副將鮑超靈營哨官儘先遇缺卽補都司胡達帶
兵隨往麻城勦賊於三月二十七日在麻城所屬之
黃土崗地方打仗陣亡又參將石清吉飛虎營哨官
花翎儘先千總李子珍於三月二十六日進攻涼亭

河賊匪打仗陣亡據各該統領查明呈報前來臣等
查該員等臨陣捐軀深堪憫惻合無仰懇 天恩
俯準敕部均照例從優議卹以慰忠魂理合附片陳
奏

謹按此摺片均於四月二十七日接奉

旨準

再九江形勢西挹武昌東引皖口實南昌之頭目而
湖廣江南之腰膂也得之難守之亦不易應山鄂省
畱兵代防湖口彭澤小姑山華陽鎮均爲九江之層
齒湖口尤爲彭蠡之咽喉漢書所謂結九江之浦絕

豫章之口強弩臨江而守者誠爲切中形勢自昔經
畫江南必以此爲重鎮矣亦應由鄂省分兵代守鄂
省以五萬三千人戰於江皖之境不僅兵事無分畛
域卽餉糈亦不容推諉惟查九江地方善後事宜大
有關係必得廉幹大員以資鎮撫且鹽課關稅經理
得人亦可稍助軍糈東征之師應於九江設轉運糧
臺則軍餉軍火由鄂起運者中道有歸宿之處呼應
較靈轉輸亦捷查有本任廣饒九南道沈葆楨忠直
廉幹才堪應變現駐廣信府城應請
旨特派沈
葆楨辦理九江轉運糧臺並飭速回九江本任實於

地方軍務均有裨益此江西九江一路布置之大概情形也李續賓擬酌帶湘軍及撫標各營渡江先清皖北而後再議皖南皖省自宿太以及舒桐賊勢蔓延已久且與廬州文報不通道途中梗楚軍遠征錢糧軍火均有本營長夫自行運送惟是深入皖境離江岸較遠則米糧軍火轉運不易且李續賓每逢大戰必預飭各營添雇民夫赶運一月軍需故能與賊久持而操縱在手不虞匱乏客兵遠征若無地方大員隨同照料亦覺呼應不靈應請飭下安徽撫

臣迅派廉明大員繞赴都興阿李續賓行營另設隨

營支應局會同湖北委員經理庶統兵大員不致分
心軍需得以一意討賊所復皖省州縣除緊要關隘
之外必難處處代守應及時設立官長舉行團練以
期得力此又皖北一帶之大概情形也至湖北分戰
分防月餉二十六萬有餘加以每月協濟湖口彭玉
麟吉安劉騰鶴等軍餉二萬餘兩又自七年設局造
船製辦軍火軍裝本年二月以後九江之雲梯地道
工費既繁卹賞尤鉅卽如兩月之內費火藥礮子各
五十餘萬觔其餘軍裝無一不取給於鄂省每月所
需已逾三十萬兩其分濟李孟羣李元度各營軍餉

尙不在此數內本省竭力籌畫悉索以應江皖之師
釐金鹽課搜括靡遺官俸營餉暫爲挪借實已不遺
餘力查山西陝西四川每月 奏定協餉各五萬兩
歷年以來均未如數如期本年正月至於四月惟山
西解到一萬兩陝西解到二萬兩四川解到三萬兩
支絀情形更甚於昔 臣等亦深知時事艱難挹注不
易供應軍糈絕無推諉然以東征江皖五萬餘人之
食責之湖北一省力實未逮應請 旨飭下四川
山西陝西迅速協濟庶東征之師免致匱乏所有楚
軍越境剿賊擬設轉運糧臺並籌餉項緣由謹附片

陳奏

上諭前因楚軍攻克九江諭令李續賓統領得勝之師馳赴六安會剿其宿太一路賊匪卽令都興阿統兵剿辦本日據官文等奏九江湖口等處由鄂省分兵防守李續賓擬酌帶兵勇渡江先清皖北再議皖南並於九江設立糧臺轉運軍火等語所籌進剿機宜與前降諭旨相符其以九江爲扼要更屬切中形勢卽照所議辦理惟九江道沈葆楨久在廣信深得民心現在江西賊匪竄入浙境廣信郡城正當喫重沈葆楨尙未可調回本任所有九江設立糧臺著官文胡林翼另派廉幹大員

妥爲經理至楚兵深入皖境米糧軍火必須地方官員
隨同照料呼應較靈卽著福濟派員繞道分赴都興阿
李續賓行營設立隨營支應局會同楚省委員辦理其
糧餉等項恐皖省無從措辦仍著由湖北籌撥接濟至
各州縣克復以後自難處處畱兵防守著卽責成福濟
慎選賢良安輯難民辦理團練自行保衛倘有竄匪卽
由皖兵策應方可以次肅清福濟務當振刷精神悉心
籌畫以期相與有成官文等所請飭催協餉已諭令四
川山西陝西各督撫迅速籌撥解鄂矣將此由六百里
各諭令知之欽此

上諭昨據官文等奏九江克復擬令李續賓帶兵先清皖北再議皖南當經諭令李續賓先赴六安本日據朱鳳標許乃普沈兆霖奏浙省軍情緊急請飭李續賓到任即可辦理軍務等語浙江省自江西賊匪由廣豐竄入後連陷江山常山開化處州等郡邑圍攻衢州上游各府悉行震動現在福興周天受等帶兵分剿兵力本尙不足李續賓本任浙江藩司新克九江聲威頗壯著官文都興阿胡林翼將皖北一路進剿事情應派何員接辦熟爲籌酌卽飭李續賓簡帶所部精兵迅速赴浙其應否由南昌饒信直抵常山抑或由蘇入浙路尙可通

並著李續賓酌量遵行將此由六百里諭令知之欽此

奏陳皖賊繞竄黃安官軍攻剿獲勝並九江撥

營上援疏

四月二十三日督發

臣等於本年四月十四日曾將副都統舒保道員李續宜等攻剿麻城踞逆埽平賊壘大獲勝仗情形馳奏在案查麻城之賊踞城死守自應四面圍圍以期一鼓而殲惟地勢平行無險可扼必須厚集兵力抽調九江援師以成合圍之勢乃援兵尚未遽集而安慶六安太湖潛山英山霍山均有大股賊匪分擾黃梅廣濟蘄州蘄水羅田等州縣邊境以圖援應麻

城之賊警報送至防不勝防均經各路官軍往來堵
剿乃賊計詭譎飄忽靡常又有另股七八千人由皖
而豫於四月十三日繞入光山商城黃安三縣交界
之舊飯店閒道疾馳十四日卽竄入黃安先是臣胡
林翼會派知府銜補用同知直隸州何忠駿督帶信
後營平江右營共千人往保黃安縣城尙未到防而
賊已猝至其麻城兵力合圍尙嫌力弱黃安繼失不
能不先其所急李續宜卽於麻城各營內調派副將
趙克彰等率奇右營副左營正仁營左仁營信營二
千五百人隨同舒保馬隊二百名馳援黃安連日冒

雨過行十六日馳抵黃安距城十里賊乘我初至營壘未定蜂擁來撲我軍屹立不動俟其逼近齊出擊之賊大敗斬擒二百餘名奪獲馬匹旂幟器械數百件追殺三四里而返始冒雨安立營壘十七十八等日雨益大溪漲陡發不能渡河十九日稍霽二十日舒保令趙克彰等以湘副左營正仁營由南路進奇右營左仁營信營由東路進信後營平江右營由東北路進各以一哨至城下誘賊餘皆捲旂伏於山後又令宋埠團勇於偏北誘之舒保則自率馬隊往來抄擊賊果分門大出突過田壠我軍鏖戰約兩時伏

兵盡出舒保親督馬隊由西而北抄擊之賊大敗我軍追至城下乘勝踏毀賊壘五座斬擒無算而賊於城下密排木椿竹簽城上則層疊礮石滾木抵死抗拒不能攻入日暮收隊此另股之賊由河南光山竄入黃安舒保等督率馬步馳勦於十六日二十日獲勝之情形也臣等查九江已復水陸東下必先清北岸皖豫之賊乃無後慮且麻城之賊尙未合圍黃安之賊更虞旁竄因檄飭浙江藩司李續賓將九江湖口等處派兵畱防而以智營前仁營後仁營先行上駐德安遏賊北竄之路李續賓自率中營右營副右

等營於四月二十二日取道黃陂會同舒保等兩路夾攻俟黃安收復之後并力麻城再行分撥肅清皖豫節節掃蕩直達安慶謹將皖賊另股由河南光山邊境竄入黃安抽撥馬步連次攻剿獲勝並九江撥援情形合詞恭摺馳奏現署黃安縣事羅田縣知縣林基督帶團勇先期駐紮麻城邊界究屬疏於防範應請旨革職暫行畱任責令畱營效力其督帶信後營平江右營之知府銜畱補湖北同知直隸州何忠駿救援亦屬稍遲應請旨摘去頂戴仍飭督勇殺賊以觀後效伏祈皇上聖鑒訓示

謹按疏內所刻各員於五月初八日接奉
旨準

奏陳北路緊要情形李續賓暫難赴浙疏八年
五月初二日督發

咸豐八年四月二十七日準軍機大臣字寄咸豐八
年四月二十一日奉 上諭昨據官文等奏九江
克復擬令李續賓帶兵先清皖北再議皖南當經諭
令李續賓先赴六安本日據朱鳳標許乃普沈兆霖
奏浙省軍情緊急請飭李續賓到任即可辦理軍務
等語浙江省自江西賊匪由廣豐竄入後連陷江山

常山開化處州等郡邑圍攻衢州上游各府悉行震動現在福興周天受等帶兵分剿兵力本尙不足李續賓本任浙江藩司新克九江聲威頗壯著官文都與阿胡林翼將皖北一路進剿事宜應派何員接辦熟爲籌酌卽飭李續賓簡帶所部精兵迅速赴浙其應否由南昌饒信直抵常山抑或由蘇入浙路尙可通並著李續賓酌量遵行將此由六百里諭令知之欽此

臣等查浙江爲財賦之重地東南之輿區江西賊匪自廣豐竄入連陷郡縣臣等每接探報寢食難安前於二月二十八日奏請飭調李元度一軍由

江西往援並分給軍餉軍械誠以大局所關不敢稍分畛域茲奉 寄諭飭李續賓迅速赴浙江藩司

本任自當欽遵辦理唯近日楚省軍情與異日皖豫軍情思患預防隱憂方切有不敢不直陳於 聖

主之前者麻城之賊首陳玉成糾合皖省各路逆匪負嵎自固多至二三萬人我軍以六千人扼其西南而尙缺其東北賊勢多於兵力不止五倍地勢平行無險可扼必俟黃安收復厚集兵力乃能并力圍剿其黃安另股賊匪不過七八千人自黃安失而德安安陸襄陽各郡縣均已戒嚴設使稍有侵軼勢必乘

虛北竄後患何可勝言李續賓於九江克復之後三日督率五營先行上援於四月二十六日馳抵黃安城外竊計黃安之賊迅速撲滅必應以全力圍剿麻城如能使逆首聚殲於楚則不僅楚省之邊患可紓卽皖豫之兵機亦利倘圍未合而賊已敗走豫皖兩省兵力較單必應由楚分兵追剿以爲北路聲援臣等察看情形二三月之內必難分兵援浙此楚省近日之大概軍情也至皖省賊匪盤踞已閱六年百姓流離困苦亟應早爲削平以弭後患自六安克復賊勢已并趨上游英霍宿太等處警報迭至都興阿所

部馬隊堪戰之士不足千名步軍如副將鮑超等驍
勇有餘未能獨任况已調援麻城下游更形單弱必
待李續賓合力進剿乃可得力如皖省軍營招納亡
命旋集旋潰近年以來投效軍營之人半多貪人敗
類若統兵大員漫無節制濫行收錄不僅無補戰守
之機實卽大爲軍國之蠹兼以穎亳一帶亂民蜂起
滋蔓難圖必應以都興阿李續賓並力勦辦節節掃
蕩能將髮逆盡殲則莠民亦且革心此又皖省軍務
之大概情形也在浙江財賦重地關係東南大局其
情形較重於皖省而皖省控引江淮界連徐豫切近

中原腹地形勢亦尤關緊要賊在金陵此固其所必爭之地也臣等原與湖南各軍密約以湖南之力清江西以湖北之力清安徽而湖北并協籌江西之吉安又代防江西之湖口彭澤九江等處並兼籌鄱湖彭玉麟等軍然後以全力注於皖北在臣等援浙援皖事同一例本無此疆彼界之心惟查李續賓一軍攻堅太久瘡痍滿目日前函請另募新兵三千冀以彌縫其闕刻下分防九江湖口小孤彭澤華陽等處共六千餘人調赴麻城黃安黃州德安各路其一萬餘人若令將所部全數赴浙則楚豫皖三省賊擾之

處實形空虛江北之賊殲滅無期若另行添募勢非
三月不能成軍千里赴援本難尅期而至浙江軍情
萬緊尤恐緩不應急臣等再四思維惟有於金陵各
營選擇大將如提督張國樑等酌派一員必可制此
兇鋒且程途較近救援較速仍俟楚省軍務稍平察
看緩急情形再行具 奏臣等竊議各路之賊未盡
則金陵之克復難期似以先清各路之賊而後並力
於金陵則兵事較爲順手且賊之狡悍慣戰應以石
達開陳玉成爲尤著一趨浙江一趨湖北察看情形
尙無急援金陵之勢似應於金陵再行抽撥應援較

爲直捷所有江北緊要情形李續賓暫難啟程赴浙緣由理合恭摺馳奏

上諭前因浙省軍情緊急諭令官文等卽飭李續賓迅速赴浙茲據該大臣等奏稱自黃安失守德安安陸襄陽各郡縣均已戒嚴李續賓於九江克復之後督兵上援黃安俟賊匪撲滅再當圍剿麻城皖省賊勢已並趨英霍宿太等處應以都興阿李續賓節節掃蕩若令該藩司赴浙則楚豫皖三省空虛等語所奏自係實在情形浙江處州被陷各隘均屬喫緊先後由和春等派總兵周天受明安泰周天培等馳往援剿並令和春督辦江

浙兩省軍務前赴浙江統率諸軍該省兵力已厚諒可
無虞竄突李續賓現在黃安勦賊卽著毋庸赴浙該大
臣等以皖省形勢爲賊所必爭擬各路肅清以全力注
於皖北係通籌全局起見著官文都興阿胡林翼卽相
度機宜妥籌辦理可也將此由六百里諭令知之

再水師副左營守備銜千總張大田係湖南善化縣
人歷隨楊載福征勦頗稱勇敢著有勞績咸豐六年
十一月內攻克武昌省城被賊鎗子中傷頭骨嗣因
傷病舉發請假回籍醫調茲查該弁已成殘廢不能
起用惟家道貧寒莫資養贍經該管水師營官副將

陳金鼇查明呈由楊載福咨請 奏懇給予俸銀以
養餘年等因前來臣伏查武職官弁勦賊立功受傷
成廢歸籍者例準給與俸銀以示體卹茲守備銜千
總張大田攻克武昌省城受傷已成殘廢殊堪憫惻
相應籲懇 天恩俯準敕部將張大田照實任官
例議給全俸準其在籍支食以資養贍而示體卹出
自 鴻施謹附片陳 奏

謹按此片於五月十五日接奉

旨 準

胡文忠公遺集卷二十八終

